

I ladins adum te n gran liber

La neva publicazion "Storia dei Ladini delle Dolomiti" de Werner Pescosta é stata prejentèda te Museo Ladin en ocajon de l'Aisciuda Ladina



La prejentazion del liber "Storia dei ladini delle Dolomiti" é stata portèda dant te Fascia a na vida enteressanta e gustègola da l'autor Werner Pescosta e da sia colega Silvia Liotto.

Publicacions - Na prejentazion lijiera e gustegola per n liber gran e pesoch, de 750 pates, che regoi e ne met dant, ence travers n gran numer de bie retrac, duta la storia di ladins de la Dolomites. L nef liber "Storia dei Ladini delle Dolomiti" de Werner Pescosta dat fora da pech da l'Istitut Ladin Micurà de Rü é stat prejentà enstadi ence te Fascia, en ocajon de l'Aisciuda Ladina te la sala Heilmann del Museo Ladin a Sèn Jan.

L'é bel poder se binèr chiò ensem a coi ladins de altra valèdes, à dit dantfora l president de l'Istitut Ladin de Fascia Antone Polam, e ence l president de l'Union di Ladins de Fascia Silvano Ploner à rebadi che te chisc tempes, canche de spes l'é senester tegnir ensem a fèr robes adum anter ladins de la desvaliva valèdes, l lurier fat da Werner Pescosta metan ensem a la storia de duc i ladins é dassen gran e emportant, e so liber merita de vegnir cognosciù e let da duc i ladins.

La usc del Comun General de Fascia - con n salut particolar da

man de la Procuradora Cristina Donei, amò ferèda da problemes de sanità - é stata portèda dal president del Consei general Cesare Bernard, che à rejonà de l'emportanza de cognoscer noscia storia, ajache la storia l'é l fondament de l'identità de ogne popol, e duta la vita de noscia comunanza ladina se poja sun chest fondament.

N rechiam a l'emportanza de noscia storia é ruà ence da man de l'ombolt de Vich Franco Lorenz, e dapò l'é stat l diretor de l'Istitut Ladin Micurà de Rü, Leander Moroder, a portèr ite più avisa l discors tel liber. Un de chi libes - l'à dit - che no vegn dat fora duc i egn, ma che ades l'era besegn de fèr, e per binèr ensem a na vida atuèla duta la documentazion sui ladins che Werner Pescosta à binà sù e regoet te egn de lurier, ge volea n liber sci gran. Leander Moroder à sotlineà l'emportanza del lurier fat da l'autor, e l'è gè a sport na lauda per aer abù l coraje de jir ite ence ti momenc e la costions più delicates e senestres, desche per ejempje chela de la opzions.

Tel contegnù del liber é jìt ite

dapò l'autor Werner Pescosta. Con na prejentazion enteressanta e lijiera, col didament de la domanes de la colega Silvia Liotto e con n beliscim e aprijà compagnament e enterzament musical di badioc Max Castlunger e Emanuel Valentin, Pescosta à portà la jent te sala a cognoscer en curt vèlch fondament e vèlch curiosità su la storia di ladins. Da la preistoria a la migrazion di popoi e la ipoteses de colonisazion de noscia valèdes, e dapò i tempes de meseria, l'influs de la religion, la scolarisazion per duc con Maria Teresa d'Austria, enscin a la prima atestazions che te chest raion vegnà rejonà n lengaz desferent dai etres e al nascer de l'autocoscienza de esser ladins. Na gran lèrga ge vegn lascià ai tempes neves, con l svilup de l'alpinism, l sport, l turism e i mudamenc economiches e sozièli, la scola e l'ambient, per ruèr al recognosciment de la Dolomites desche patrimoniè mondial da man de l'Unesco e a l'esperienza del Superski Dolomites, la realtà che sot l'impuls economic la é stata bona de fèr garatèr l'unità anter ladins più che chel che é states bones de fèr la istituzions amministratives e culturèles.

La "Storia dei ladini delle Dolomiti" de Werner Pescosta l'é de segur un de chi libes che cognessa esser te ogne cèsa, magari no da se tegnir apede let per l'èjèr da sera dant de dormir, ma da poder tor cè e vardèr fora ogne outa che se vel aer informazions segures su la storia e la realtà de noscia val. Per didèr la consultazion junsom al liber l'é ence duc i aparac: notes, bibliografia, dizionarie storich e l'indesc di inomes di argomenc, di lesc e de la persones che se troa tel liber. L liber é da poder troèr ence te Fascia, alò dal Museo Ladin a Sèn Jan.

Lucia Gross

L Cianton de l'Istitut

Picola rubrica de informazion culturèla

"Carletto Weiss e la geja de Sènt'Uiana"



Carletto Weiss da passa 25 egn l se cruzia de tegnir averta e rencurèda la geja de Sènt'Uiana.

La geja de Sènt'Uiana l'é una de la testimonianzes più emportantes de la storia religiosa de noscia comunanza, fin dai prumes tempes en cà. Sun chest monument storich e religios pèr Frumenzio Ghetta à scrit l bel liber "La leja de Sènt'Uiana" dat fora da l'Istitut jà del 1994.

Tel video che vegnarà moscià la setemèna che vegn su Tele Minoranze Linguistiche, podaron veder e cognoscer miec chest patrimoniè de èrt e de memories tel cher de duc i fascegn de gra a na persona che à abù na pèrt emportanta te la storia del restaure e de la conservazion de chesta picola geja, Carletto Weiss da Vich, che per passa 25 egn se à cruzià

de rencurèr chest bel santuarie e de ge moscèr a chi che ruèa sù l tesor de storia, fe e èrt conservà laite.

Con sia paroles Carletto met al luster detaes che se pel descorir anter i depenc e la feures zipièdes e ne conta con sia usc amò gaerta de canche l'é stat fat i lurieres de restaure, che ge à dat l met a chesta bela e veia geja de poder esser endodanef aprijàda te sia beleza originèla, dò esser stata per egn alalongia desmentida e arjumèda, desche se podarà veder te la fotos storiches che testimonie la condizions zompes de la geja dant de vegnir restaurèda. Tel program se podarà viver endodanef, te la paroles emozionèdes de Carletto, l moment de la descorida de la bergamina de consacrazion de la geja o canche l'é stat troà i resc de n ciaslir retich de l'età de Fer, testamonesc de l'emportanza de chest lech fin dai tempes veiores.

N gran devepai volon ge l sporjer a Carletto Weiss e a la jent da Vich, che se à dat jù per rencurèr chest scrign prezios, memoria de la storia e de la fe de duc i fascegn.

Oraries (orientatives) de "L cianton de l'Istitut" su TML
de lunsè da les 15.45
de mèrtesc da les 18.15
de mèrcol da les 22.15
de jebia da les 20.15
de vender da les 11.30
de sàbada da les 18.15
de domenica da les 21.00

Didèr per se didèr

Na serèda te Comun de Poza per fèr cognoscer ence te Fascia l sistem de l'Auto mutuo aiut

Sozièl - "Didèr per se didèr", l'é chesta la rezeta, scempia ma percacenta, che ge à jà permetù a n muie de jent che à n problem o n dejèje de troèr n aiut, n sostegn o amàncol mingol de serenità. Chest sistem é cognosciù desche "Auto mutuo aiut", e l se poja su l'idea de ge dèr l met a jent che padesc, che à n problem, o che aboncont i é dò a viver n moment senester, de se binèr ensem a con de altra persones che é te la medema situazion, per poder rejonèr e condivider problemes che va da la dependenzes de desvaliva sort (dal jech, da sostanzes, da persones) a l'ansia o la depression, al sostegn a chi che à familières pedimenté o con malaties senestres, fin ai problemes de autostima, de alimentazion, de manconia o de solentum, e etres

amò. Nasciù dal sistem de Hudolin e di club alcologiches, jà prejenc da egn ence te Fascia, l'Auto mutuo aiut l'é recognosciù da l'Organisazion Mondial de la Sanità desche un di strumenc de maor enteress per ge dèr ai sentadins responsabilitè e protagonism.

A Trent e fora per l Trentin la sociazion "A.M.A." é jà ativa con bon ejit con n muie de gropes sun temes desvalives, e enstadi l'é stata prejentèda ence te Fascia sun proponeta de Nadia Cadrobbi, joena da Poza che te chesta sociazion fèsc sie stage de università. L'assessora a la politiche sozièles del Comun de Poza, Renata Mattevi, à tout sù con gran gaissa la proponeta de sostegnir e de fèr cognoscer ence te noscia val chest

sistem che poja sia reijes apontin sul "didèr per se didèr", n fondament de solidarità che à semper caraterisà noscia comunanza.

Lenconter per ge prejentèr e fèr cognoscer chesta oportunitè ence a la jent de Fascia e veder se fossa de ütöl ativèr ence te val vèlch un de chisc gropes é stat endrezà enstadi te sala del Consei de Comun de Poza e l'à abù na gran bela partezipazion e n bon aprijiamet. A rejonèr de l'Auto Mutuo Aiut e de sia metodologia l'è ruà l fondator de la Sociazion "AMA" de Trent, Stefano Bertoldi, ensem a l facilitator del grop su l'ansia de Trent Tommaso Clemente e desvalives componenc del Grop AMA su la manconia de Ciavaleis, che i à portà sia testimonianzes.

Se troèr te anter jent che te scoutè zenza giudichèr, per spartir

coi etres l peis de n problem e se miorèr de l'esperienza de chi che à jà troà fora vèlch soluzion o vèlch risposta ütola: chest l fondament de chisc gropes, olache la persones no vegn conscidrèdes problemes ma ressorses. Chiò chi che tol pèrt pel aer dassen n gran joament, ge vegn domand demò de aer envers i etres componenc del grop l respet più gran, vardan de no dèr mai giudizies e de se tegnir semper per sé chel che vegn dit te la scontrèdes. Chi che aessa enteress a n saer de più o i volessa tor pèrt a n grop de auto mutuo aiut i pel tor contat con la sociazion A.M.A. vardan sul sit www.automutuoaiuto.it (lg)



Stefano Bertoldi, fondator de la sociazion A.M.A. de Trent, à spiegà a Poza l'organisazion e la metodologies de l'Auto Mutuo Aiut.